

14 Disember 2011

Tumpas lepas 12 tahun edar dadah

KUALA LUMPUR: Kelicikan seorang lelaki menjalankan kegiatan pengedaran dadah di Brickfields hingga dapat mengelak daripada ditangkap selama 12 tahun berakhir apabila ditahan bersama tiga rakannya dalam serbuan, petang semalam.

Ketua Polis Daerah Brickfields, Asisten Komisioner Wan Abdul Bari Wan Abdul Khalid berkata, lelaki berumur 30 tahun itu yang juga terbabit penyalahgunaan dadah tidak pernah ditahan sepanjang penglibatannya dalam jenayah itu.

Beliau berkata, hasil maklumat orang ramai sepasukan polis menyerbu sebuah stor di tingkat bawah sebuah bangunan di Jalan Bukit Pantai, di sini, dan menahan lelaki itu serta tiga rakannya.

"Lima bungkusan berisi daun kering dipercayai ganja seberat 587 gram bernilai RM1,200 dirampas," katanya.

Wan Abdul Bari berkata, lelaki itu serta tiga rakannya berumur 23 hingga 27 tahun yang juga pekerja syarikat pengurusan bangunan itu didapati positif dadah selepas ujian air kencing.

Sementara itu, dalam kejadian berasingan, taktik seorang lelaki tempatan berusia 40 tahun menyimpan dadah dalam kotak makanan segera terbongkar selepas polis menahannya sebelum menemui dua bungkusan lut sinar mengandungi ketamine seberat 2020 gram berharga RM120,000 di hadapan sebuah salun kecantikan, di Desa Sri Hartamas, di sini, Sabtu lalu.

Dalam kejadian pada jam 4.10 petang itu, sepasukan polis yang bertindak atas maklumat orang awam terserempak suspek di kawasan berkenaan dalam keadaan mencurigakan dipercayai menunggu pelanggan sambil memegang kotak terbabit.

Menyedari kehadiran polis, suspek ketakutan sebelum cuba melarikan diri.

Beliau berkata, polis mengejanya dan berjaya menangkap suspek sebelum menemui ketamine berkenaan.